






ル 5
3525
12







門 5
號 3525
卷 12



一
卷

州
竹
枝
詞

早稲田大学図書館
昭和36.9.26
藏書

揚州竹枝詞序

秋雲再削瘦漏如文春凍重雕玲瓏似筆挾荆軻之
匕首血濡縷而皆亡然溫嶠之靈犀怪無微而不照
招尤惹謗割舌奚辭識曲憐才焚香恨晚蓋廣陵風
俗之變愈出愈奇而董子調侃之文如銘如偈也更
有失路名流拋家蕩子黃冠緇素阜隸屠沽例得載
於詩篇并且標其名目譬夫釀家紀叟青蓮動問於
黃泉樂部龜年杜甫傷心於江上琵琶商婦白老謔
行石鼎軒轅昌黎序次修翎已失猶憐好鳥之音碧
葉雖凋忍棄名花之本酒情跳盪市上呼騶詩興顛

狂墳頭拉鬼於嬉笑怒罵之中具蕭灑風流之致身
輕似葉原不藉乎縉紳眼大如箕又何知夫見錢虜
乾隆五年九月朔日楚陽板橋居士鄭燮題

竹枝詞題詞

國風小雅多有刺譏之文孔子蓋嘗刪之所以並存
不廢者勸善懲惡同歸忠厚有功名教是非一也董
子恥夫不羈之才半生落魄酒後耳熱戲爲揚州竹
枝詞狀揚州之情事殆盡庚申十月偶遇郡城董子
方以是編付梓或以其言譽者固多毀者亦復不少
于古人溫柔敦厚之意未免失之予曰不然揚州風
俗江河日下得董子詼諧以激礪之可以返澆爲淳
去華就實則此書爲功揚州不小斯正風雅勸懲之
義雖謂之溫柔之教可也海陸顧于觀書

揚州竹枝詞

點滴秋霖夜剪寒燈一編三復破蕉窗下千古董狐
眞史筆筆神駭鬼詫恰又是家常閒話白璧黃金
隨處有算文章光怪還無價一顆顆明珠瀉 一褒
一貶春秋亞有多少青衫落拓咨嗟淚灑却笑屠沽
諸子弟轉眼骨銷形化反賺得詞人一罵我輩唾餘
閒點綴令人天稽首慈悲怕莫認作窮酸大
右調金縷曲天台天姥閒人潘西鳳

揚州竹枝詞

江都

董偉業恥夫著

揚州

陳恆和書林刻

稽古竹枝之作所以紀土風諷習俗也余家居
無事偶有感觸輒成絕句共得九十九首總題
之曰揚州竹枝詞噫紀土風乎諷習俗乎

保障河中晚唱船徐甯門外蚤春天只栽楊柳蓮花
埂不種桑麻芍藥田

奇書賣盡不能貧金屋銀燈自苦辛怪煞窮酸奔鬼
國偷來冷字騙商人

廣陵濤水日東流芳草年年長玉勾萬頃不如紅一

點膏腴賣盡買溫柔

土地燈完二月中年年思想做財翁借銀又上邗溝
廟到底人窮鬼不窮

誰家年少好兒郎岸上青驄水上航猶恐千金揮不
盡又擡飛轎學鹽商

丙丁甲乙酌時宜只要文章中運司到得開徵標第
一通河紙價貴桑皮

清明節過便晴和濫賤刀魚入市多最是酒懷禁不
得菜花天氣賣泥螺

聽簫館取吹簫句大士堂題百子堂怪底揚州一二三

月男人歌唱女燒香

何處書燈爛若雲英才罇酒醉評文牆門雨露都春
色白李紅桃夜不分

緯帽通紅耍頂華碑磔蒙混轎窗紗慣尋小忿驚鄰
里保正前行拜捕衙

夜舞朝歌結病胎牀頭金盡色如灰莫言苦口無良
藥明日人參客到來

駝酒駝茶未息肩又駝皮貨又駝羶飢餐白滾安江
杜飽喫乾烘玉峽泉

効力商門有俸薪也隨騎馬出尋春馬前馬後皆奴

輩得意中間第二人

新起門樓冒甲科大紅門簿老爺多連圈告示銀硃
透照得鄉紳署照磨

紅橋遲日鶯兒嬾古渡香泥燕子肥多少迷樓樓畔
客不思歸去怕春歸

羅綺衫裙鬪剪裁借人妝點上層臺莫因脂粉高身
價八個開元跌出來

瓊花臺上月同登塔院蒲團悟太乘兩地年年共酬
唱崑霞道士詠堂僧

金壽門稱老客星肩書懷硯短童青苦心文字多情

事春雨桃根瘞狗銘

清和天氣暖風徐脫盡棉衣四月初慶譽典旁沾戴
酒櫻桃市上買鱖魚

布襪青鞵懶自眞何因奔走累閒身通河一例衣冠
盛莫認闍人是主人

白板青油戶半開倚門人戴紫玫瑰玲瓏燈照黃昏
月知是郎從店口回

萬樹松栽費萬錢萬松亭在萬松顛更添勝景超前
輩另鑿平山第五泉

平山堂左棲靈寺寺左新營百尺樓樓下煙雲樓上

看看無分曉是揚州

求條籤去修雙脚嗅袋烟來剃個頭等戲開臺先坐
橙看汪班內老名優

不惜黃金買姣童口含烟送主人翁看他呼吸關情
甚步步相隨雲霧中

書詞到處說隋唐好漢英雄各一方諸葛花園疎理
道彌陀寺巷鬪雞場

香輿出郭繡簾開夫婿前行僕後擁永保平安無病
疾都城隍廟捨身來

城河五月淺於溝水上紅裙豔石榴手把素紈遮半

面撩人眼不看龍舟

董公祠下淚沾巾劉丈生前得句新入夜管絃歸醉
客侵晨鼓吹送喪人

清宵破屋掩傾欹冷雨酸風酒罄時一點燈昏疑鬼
哭不堪還讀老匏詩

確齋老人眼失明談詩說字氣縱橫十年二度移家
去處處堂名署晚耕

顛頑道士酒葫蘆潑墨顛狂捉筆麤行樂到今傳不
朽出門圖與上天圖

死矣詎諧葛三丈生平意氣孰如君明年風雨梅花

嶺誰上孤忠閣部墳

丁大生存怕寂寥一雙聾耳賦聞簫黃泉另是銷魂地莫認人間廿四橋

黃江樓死死何之曾見攜兒借米時地下有書休便讀恐遭愚鬼笑君癡

五月纔過六月忙觀音山上禮空王夜歸船點琉璃熱裸臂人歌燒肉香

滑滑街泥屐齒無攜籃左手右攜壺昨朝滴到今朝雨官府開屠不禁沽

盤香燒盡代蚊烟當被袈裟沒半邊破鼓缺鐃忙六

月大家酒醒化茶緣

茯苓糕賣午茶風茉莉花籃走市中猛聽一聲尖入耳長腰健婦喊牙蟲

章句吾儒轉見疏梨園一曲重璠璣爲裁子弟纏頭錦不買兒孫滿腹書

城隍宮近殺人場和尚奇窮不點香有客讀書無客至詩成且共鬼商量

嬌歌連像動人心流水高山沒賞音寄語生兒工儂粉不須古調學彈琴

清客絲絃柅子歌粉屏明後玉人多分明曲裏新聞

事記得傳來是賣婆

磨磚宅地賽比鄰乳母年輕看不暝深巷重門能引
入一聲聲鼓說書人

香閨指爪玉纖纖鍼線原來不自拈三寸弓鞵紅一
擗工夫費盡是茅檐

安息香薰轎晚回掀簾下轎笑言開青蚨婢捧誇夫
婿百二十張贏得來

閩中筆妙黃躬懋大婦溫柔小婦賢曾見隔簾扶阿
囡看郎調粉畫神仙

蔣子丹青鐵甕城大江南北鐵琴名多情未肯腸如

鐵夢裏鴛鴦腕下生

老桐與竹結知音苦竹雕鏤費苦心十載竹西歌吹
夜幾回燒去竹爲琴

天印山農飲興豪不空酒盞吝錢刀年來走遍江鄉
路爲譜開平祖德高

賽會迎神次序排捨身人各照腰牌今年例許收瘟
疫不禁鳴鑼過院街

鞞破難縫走不忙忽然閒跳又慌張太平鼓子銅錢
響親喊一聲王大娘

李三潦到瓜州寓鐵笛閒吹幼婦詞謝客送柴忘乞

米苦心枵腹斷腸詩

嗜飲耽吟王俠儒相尋相遇便提壺那堪近日貧兼
病典盡圖書酒不沽

小老媽懷抱小官小朝奉大小爺歡揚州時道當羣
小戲子燈籠小亂彈

一聲盤古分天地五字開門進萬金何異東塗西抹
者不驚人句也高吟

茅屋花籬牡蠣牆自然清韻叶宮商我將譜得新詞
唱日日來過李又唐

推簾微笑學含情路上人看說姓名識得兒家夫婿

小半開門是一新生

坐上賓來自米行東君箕踞北窗牀砲頭銀子支頭
用大賈而今變小商

畫有標題視有銘新鮮冊頁整圍屏書房半日天平
響客坐家奴側耳聽

婦女僧尼擠不開打包行脚看疑猜紫衣和尚衣還
紫又向天甯說法來

衣穿永字口談文扇面行書句不分德政冤單牢記
取太翁門下說新文

八月中秋秋氣新滿街鑼鼓鬧閑身光明寶塔光明

月便益男人看女人

問他家本是蘇州開過茶坊又酒樓手種奇花供客
賞三春一直到三秋

空心筋斗會騰那喫飯穿衣此輩多倒樹尋根鄒必
顯當場何苦說飛蛇

孫猷周逢笑口開眼中摘豆手飛杯因之看盡人情
巧事事多從戲法來

太倉絃子擅東吳醒木黃楊製作殊顧漢章書聽不
厭玉蜻蜓記說尼姑

可憐窮死楊鬍子撮笛吹簫氣莽蒼最愛酒酣歌首

曲老回回與醉劉唐

劉魯瞻吹笛著名精神閒雅氣和平問渠強作知音
者解弄梅花第幾聲

張天奇手會雙叉眾眼睜睜看不諱踮脚伸頭聽耳
急鐵連環響滿身花

豐樂朝元又永和亂彈班戲看人多就中花面孫猷
子一齣傳神借老婆

酒店歌臺浪得名江天社鼓昔年情登場顧曲銷魂
事淚滿秋衫贈馬生

徽州火把紅油刷翰院燈籠紫紙糊搶過花冠傳過

袋進房先看伴娘姑

州同候選死光輝孝幔鮮明到桌圍執事有單門有簿
簿寥寥寥寥鼓客更衣

坐得船歸是武昌便投本店說新綱中堂不用了鬢
稟門裏人今做小郎

扛來鹽課轎夫肩燈下開包夜不眠三兩三錢都大
錠上司朝奉剪銀邊

梵覺僧房寓楚狂當年燈火記聯牀青童散去黃金
盡何地淹留忘故鄉

張樸存詩思入雲日能無見耳無聞苦吟直擬秋風

瘦楓葉蘆花白似君

風雅多情王濯江時憑卮酒話鐙窗揚州盡似君憐
我一片愁心那不降

菊花時候雨銷魂曉霽園田淨草根過小紅橋葉公
墓看飛來鶴傍花村

黃花盈甕酒盈鐙掃徑呼朋待月生剝蒜搗薑同一
嚼看他螃蟹不橫行

北客南來到此鄉未諳風土下驛行過河一帶秧歌
脚稻草檐低瓦礫牆

車馬登高九月涼有人散步只奚囊觀音閣上司徒

揚州詩
廟冷眼西風看醉鄉

小東門接大東門舊縣西街早肆喧麵長大魚周大
脚過橋湯不亞橋園

午飯梳頭倦不勝棉衣須補補何曾秋波未覺秋風
冷自向門前看老菱

霜花滿地少人行牛肉湯餲趁五更蟋蟀勢窮何處
使鶴鷄場上看輸贏

北風吹冷不晴天窮漢長街望午煙齊上混堂花酒
店裏添棉與外添棉

聚飲寒天結伴行熱沽火對瓦壺盛誰家爇燂多油

水張士美同盧漢卿

鵝毛雪片利於刀酒店齊行酒價高何物市兒無賴
甚冷冰冰手劈蟬蠹

運司門口查原當舊帽新翻緞子街伍少西家絨襪
貴戴和美店看瓊鞵

吟髭撚斷坐三更燈火家人說不情東舍西鄰鬪歌
舞何會中有讀書聲

忠臣祠外雪風加孝子墳邊噪暮鴉最是乞兒歸路
苦玲瓏古月照梅花

避客年來高鳳岡叩門從不出書堂想因悞讀香山

句紙閣蘆簾對孟光

鐵佛禪林松樹陰果然鐵佛鐵爲心枯僧古水糧頻
絕忍餓寒天抱膝吟

衛容齋自有天真南北東西走此身冷著布袍泥著
屐不辭風雪我詩人

六一堂前車馬路兩兩三三說詞賦揚州滿地是詩
人顧萬峯來留不住

天生蔡胖不肥癡妙筆能傳古畫師他日相逢好生
活煩君圖寫竹枝詞

夢醒揚州一酒瓢月明何處玉人簫竹枝詞好憑誰

賞絕世風流鄭板橋

鏤血嘔心苦費思惹人罵不合時宜問何家世何名
目自號揚州董竹枝

揚州竹枝詞跋

滿頭花插笑口難開雙耳風生吟肩空聳廿四橋邊
夜月未知何處吹簫十三樓上春雲更有阿誰倚劍
填胸中之壘塊惟酒能澆薰眼底之腥羶非詩莫遣
照面皮於菱鏡瘦肥雜以妍媸配脚色於梨園生旦

兼之淨丑盡數和盤托出從新依樣描來干寶搜神
爭似董狐直筆齊諧志怪頓教賀鬼狂呼皖江鐵笛
生李勉

竹枝詞言風俗也風俗必由乎人故九十九首各有
所指然贊歎惋惜者雖小技必著其名譏切則諱之
亦忠厚之道也愛江先生所以得風人之旨歟天印
山農常執桓

揚州竹枝詞終

望
南
百
調

天
卷

望江南百調題詞

潘文熊

占南

一夢春婆憑誰證雪鴻消息有新詞一卷言罪玉屑
兵燹曾經滄海感繁華仍見邗溝蹟把竹枝好句細
吟哦思今昔已往事悲陳迹當前事多歧轍看花花
世界日新一日明月二分依舊好春風十里從頭說
括歡場勝事百篇中才人筆

臧

穀

詒孫

卅載光陰一擲梭吾鄉風物近如何得君百首詞翻
出纔覺揚州好處多

江夏才名世少雙梅花笛裏譜新腔竹枝那有此音節突過當年董愛江

開元歲首書元旦最後名花紀殿春雅有田疇栽芍藥腰圍金帶屬何人

小遊船泛夕陽時曾和辛郎湖上詩辜負藕花好天氣不如黃九善填詞

楊泰煥

無人不道揚州好我亦年年騎鶴來到此不勝今昔感蘄新世界是天開
詞成百閱望江南妙筆能將造化參斗酒謫仙同此

興箇中滋味耐咀含

熊昭漢 緝孫

南朝金粉舊知聞先讓揚州月二分古轍今風綜括盡三生惆悵杜司勳

不到揚州已十年前塵如夢夢如煙屯田新曲流傳偏好共瓊花一例妍

周士鴻 蘭賓

蕪城有客吟肩聳韻事新從畫舫探好共怡園稱絕唱清詞百閱望江南

何震彝 密威

曾見邗江三百吟
蒐羅風土瀾靈襟
里堂道聽通齋
記曠代遺聞取次尋

望江南百調

並引

白沙

惺庵居士

稿

揚州 陳恆和書林刻

吾揚舊有費執御先生望江南百調廣陵韻事標
舉無遺百餘年來景物都非風俗亦異不揣謏陋
妄思效顰梁夢醒餘浪灑金壺之墨蕪城紀徧遠
輸畫舫之編以俚言道俗情雜悲歡與諧謔管絃
試譜聊供陶寫於中年游戲為文敢備輶軒之下
采

揚州好元旦賀新年親友到門投赤柬兒童壓歲掛
青錢華服盡翩翩

揚州好燈節慶元宵絳蠟滿堂家宴集金龍逐隊市
聲囂花鼓又高蹻

揚州好勝日愛清明白袷少年攀柳憩繡鞋游女踏
莎行處處放風箏

揚州好端午樂何如到處艾絨懸繡虎大家蒜瓣煮
黃魚跳判鬧通衢

揚州好暮景是中秋大小塔燈星燄吐團圓宮餅月
痕留歌吹竹西幽

揚州好重九快吾曹聯袂鞠橋同訪豔振衣松嶺更
登高沽酒晚持螯

揚州好霜降駕驂駢亭迓喜神供鎧甲刀橫武士擁
旌麾不戰有軍威

揚州好冬至日晴烘應候湯團如雪潔消寒佳饌不
雷同快樂富家翁

揚州好盛典舉迎春熊軾八擡瞻綵服牛鞭三尺動
香塵隨後有芒神

揚州好祀竈肅衣冠清酒黃羊忱款款雲車風馬夜
漫漫神力保平安

揚州好除夕樂銜杯爆竹聲喧千戶接唐花景麗一
時開避債有高臺

揚州好郭外飽看花道觀天桃爭秀色寶城秋菊鬥
奇葩佳日賞芳華

揚州好高會谷林堂試茗有泉烹白雪傳荷當日集
紅妝山色隔江望

揚州好入畫小金山亭榭高低風月勝柳桃錯雜水
波環此地卽仙寰

揚州好法海寺閒遊湖上虛堂開對岸水邊團塔映
中流留客爛豬頭

揚州好高跨五亭橋面面清波涵月鏡頭頭空洞過
雲燒夜聽玉人簫

揚州好祠祀重三賢風雅一堂同軌轍雪泥數處證
因緣蘋澗傍桑田

揚州好巨剝首天甯畫檻三層龍藏閣玉階雙峙
御碑亭後面又叢林

揚州好闢地課蠶桑舊舍省耕臨 萬乘新陰移種
列千行短短四圍牆

揚州好閣部史公墳孝子蕭祠相接壤忠臣信國是
前身梅嶺仰清芬

揚州好街小傍河千人影衣香廊曲折柳園花墅客
盤桓倚檻把漁竿

揚州好城外小遊船款乃聲喧楊柳岸溫柔鄉在藕
花天村舍儘留連

揚州好河號小秦淮幾道畫橋萍影聚沿隄深巷柳
陰排綠水淨於揩

揚州好鬧市是新城的爍鋪燈懸電氣喧闐車轍走
雷聲人語到三更

揚州好僧院木蘭存紺宇鐘聲依舊送碧紗詩句至
今論勢利笑空門

揚州好十二女郎祠一炬赤燦完正氣千秋白玉比
清姿愧煞幾鬚眉

揚州好仙觀毓瓊花千點珍珠天降種一環香玉月
銜華亭子石欄斜

揚州好廟祀許真君靈爽倘邀騎鶴降畫圖詳紀斬
蛟勳士女說津津

揚州好萬佛舊名樓玉座成行依棟宇全身對榻覆
衾稠燈燄似星稠

揚州好宮觀祀純陽大樹高如多寶塔癡人欲乞點
金方夢孰醒黃梁

揚州好董子有崇祠正誼額猶留 睿藻大儒坊合
表遺徽誰更下書帷

揚州好古蹟兩相望隋代選樓鄰相府昭明書舍訪
禪堂題額鐵兼王

揚州好城內兩何園結構曲如才子筆宴遊常駐貴
人軒東閣返魂梅

揚州好幾等學堂開名別官私分教育課兼中外植
英才一歲一班來

揚州好高館售圖書洋式樓邀三面月平鋪橋跨一
條渠勸學榜門閭

揚州好廣闊體操場人比蝦蟆跳足走羣如獅子搶
球忙從此國民強

揚州好女學集瑤姬黑面書編懷裏挾黃皮包裹手
中攜真個賽男兒

揚州好花局試徘徊繞屋清陰蘆箔護分行濃豔瓦
盆栽雅意比憐才

揚州好比戶戴春林一樣牌題名士手幾番香醉美
人心脂粉舊馳名

揚州好燈市兩回新緞子街頭花世界轅門橋頂錦
春城蜂擁看燈人

揚州好書廠破愁魔說到飛跏回味美聽來皮癢發
科多四座笑呵呵

揚州好小聚到公園奇石當階真透網名花入座總妖妍招待有毛髯

揚州好豪啖酒家樓肥烤鴨皮包餅夾濃燒豬肉醮饅頭口福幾生修

揚州好麪館數名園澆別三鮮隨客點肴烹四簋及時陳飽啖價休論

揚州好茶社客堪邀加料乾絲堆細縷熟銅煙袋臥長苗麩酒水晶肴

揚州好北郭啟文明寶馬香車花下路釵光鬢影竹中亭啜茗遣閒情

揚州好小喫勸君嘗蜜餞濺牙桃杏脯酥糖到口桂蘭香風味最難忘

揚州好點綴苜盤中北郭羹薑哥子綠東鄉蘿蔔女兒紅莫笑老冬烘

揚州好解渴愛芳鮮菱角半盤新翠溼勃臍一串大珠連消受數文錢

揚州好臘八粥真佳託鉢尼僧羣募化調餉巧婦善安排棗栗稱清齋

揚州好買米鳳凰橋彌望斗筲人盡是公然珠玉價同高清早市聲囂

揚州好沐浴有跟池扶掖隨身人作杖摹摹徧體客
忘疲香茗沁心脾

揚州好捏像合推袁妙肖傳神真面目裝潢餘事小
琴樽絕技擅專門

揚州好僑寓半官場購買園亭賓亦主經營鹽典仕
而商富貴不歸鄉

揚州好商界勢薰天食客盈門工獻策財神大會廣
開筵滿座總貂蟬

揚州好酬應好排場手版高呼門子接肩輿飛過僕
夫忙翎頂共輝煌

揚州好服飾競時髦鐵卡皮鞋聲橐橐銀絲眼鏡帶
高高雙鬢刷蘭膏

揚州好年少氣桓桓臂捲盤金烏袖窄手揮小扇黑
油單草帽滾邊寬

揚州好時樣下朱樓衫稱小蠻腰窄窄梳籠劉海髮
髻髻襟上繫花球

揚州好浴罷晚梳妝雪白羅襦蟬翼薄霞青紗褂麝
蘭芳花插夜來香

揚州好飛轎羨醫生術擅中西聲價重門分早晚藥
金增滿載趨歸程

揚州好繪事亦堪豪先惠筆資懸潤格任催畫債懶
揮毫幾輩負名高

揚州好古玩富收藏周鼎漢甄箱什襲宋書元畫錦
裝潢癖嗜有蕭郎

揚州好骨董客高談金石刮磨奇貨視丹青裝點古
人叅眞贗幾曾諳

揚州好漆器最精純盧氏銅胎工仿古朱家鐵筆善
翻新賽會許奇珍

揚州好耍貨肆前攤木棒花籃洋畫片粉孩泥佛采
皮丸博得小兒歡

揚州好借貸到邗溝天鑿苦衷如我願人難應手向
神求黃白解窮愁

揚州好十廟把香燒郎爲祈年更佛慢妾因却病換
神袍徼倖福能邀

揚州好土地誕初逢畫壁觀瞻來婦孺神燈攫取鬧
兒童冠帔案頭供

揚州好香進準提庵黃紙書從方丈室紅燈焚對寶
陀龕粉黛性成憨

揚州好賽會號雙盲白眼橫加憐瞶瞶紅旗分執共
踴躍隕越慎提防

揚州好神會出城隍泥膝拜香癡婦女跣肩隨駕俏
兒郎三次利孤忙

揚州好勝會出都天茉莉萬花穿織扇笙簫兩部導
鞦韆臺閣矗雲煙

揚州好華誕拜觀音香海紅雲光燭野佛堂綠女汗
沾襟求子有同心

揚州好餽口號孟蘭鏡鉢當街隨意擊袈裟高座喜
人看路鬼暗譏姍

揚州好水會夜深過桂楫迎來都土地荷燈放滿護
城河施食市僧多

揚州好午節賽龍舟蠲足八枝爭打槳豬脬幾個比
拋球標奪鬧中流

揚州好壽寓有輝光朱幃金屏環海屋瓊簫檀板奏
霓裳濶派雜官商

揚州好嘉禮愛堂皇吉日笙歌迎綵轎良宵花燭鬧
新房月老已過牆

揚州好節後女娃忙糗裹綠菰供大嚼餅包紫萸待
分嘗一路棒兒香

揚州好家祭夾徽揚鼓伐三通呼就位燈持五色學
跑方亭設紙豬羊

揚州好龍槓昇棺行方相大於新鬼態銘旌旁署貴
人名先引客多情

揚州好傳戒在禪林滿地蒲團販寶座傾城檀越捨
黃金多少客師臨

揚州好羽士藉驅邪響徹清簫沈碧漢光騰綵帔絢
丹霞高唱四時花

揚州好古禮有鄉儺面目喬裝神鬼態衣裘跳唱女
娘歌逐疫竟如何

揚州好南北戲分臺名角兩班排日演學員半票似
潮來旋閉又旋開

揚州好傀儡戲登場凡事由人陰簸弄此身任自負
昂藏木偶也冠裳

揚州好二女合成班縞素絕憐裝教子輕盈最是唱
思凡花貌鞞雲鬟

揚州好把戲逞姣嬌走馬柳腰輕貼地行繩蓮瓣欲
凌霄淮北土音嬌

揚州好鼓樂十番多豪竹分明如法曲哀絲婉轉當
清歌緩急應雲籟

揚州好烟景頗堪娛萬點蜂中呈采鳳九條龍後放
飛魚金彈響連珠

揚州好缸滿畜金魚千百錦鱗霞散綺幾叢翠荇水
跳珠負郭數家居

揚州好雅製費心裁社結詩鐘邀友入箋書燈謎請
君猜奇想訝天開

揚州好花窟足勾留羅襪凌波誇石首玉簫吹月試
珠喉狎客樂忘憂

揚州好角勝碰和工軟硬三元中發白清渾一色万
條同方向辨門風

揚州好蟋蟀鬥紛紜如虎幾人誇異種牽羊九日策
奇勳供養鐵將軍

揚州好溜雀校場中月樣紅叉鸚鵡架水磨黃竹畫
眉籠顧盼健兒雄


揚州好籃畔跌金錢磁器淺鐫花卉細銅絲密綴蕊
珠圓贏得贈嬋娟


揚州好喚賣聽聲聲玫瑰花新開爛熳櫻桃果熟透
鮮明兒女盡歡迎

揚州好芍藥殿春風曾記玉樓嬌並蒂豔傳金帶非
三公花會洛陽同

望江南百調

終





26105

